

田

亭

草

勅封太安人金母陳氏墓誌銘

太安人陳氏者贈承德郎戶部主事賓魯公



副君時舒之母也太安人生正德庚辰年八月十七日午時卒萬曆庚戌年五月廿三日巳時享壽九十有一戶部公先太安人卒葬于邑鳳山之原今憲副君將奉太安人柩啓窆而合焉先期持所爲狀謁余請銘淚淋零下不能自禁也余慰之曰太安人躬被綸命壽考令終即不爲百歲人亦人世所罕觀矣君何痛割之深也憲副君爲余言曰世所稱婦順母德大都事舅姑孝相夫子勤教子義方顧遭時履順易

爲力耳乃吾母太安人所處有極難者母歸先府君時先大母徐蚤世繼大母沈爲大父清湖公榷家有女七人長者責資裝少者責膏沐并珥先府君業儒不治家人產咸于母取辦焉數米之炊雖巧婦無能饒給稍弗愜意即譴訶及矣甚則箠朴隨之母怡色吞聲不敢萌憤懣態怱營綴緝務曲當大母心是吾母之奉舅姑難也先府君承先世薄業計田畝所入不能具饘粥授徒里中脩脯重重母佐以女紅宵旰勤必屬嘉靖之季兵燹騷亂生計日絀里隣有忍殍立槁者母鬻力程口勉濟糗殮比寇難平歲稍豐登

始漿酒臠肉相慶也而先府君性慷慨閒適時時有  
賓客過從之懽母鮮腴供具絕不以窘匱爲解是吾  
母之相君子難也不肖時舒駑劣先府君授之一經  
母給楮穎膏燭督之甚厲顧不能無嬉惰以煩擯楚  
又或觸母怒至徹其所饕驅之詣塾稍長游賢豪間  
知憤發矣母嘗質水簪供文社飯而礪鈍策蹇寸進  
殊淹碌碌曹卽食貧如舊既剖符畿輔方極意拊循  
庶幾無得罪百姓顧值兇弁之搆以當斷不斷受母  
誚責是吾母之教子又若此其難也曩不肖將丐休  
稟命吾母母忻然曰吾志也與子偕隱居恒一蔬一

肉守先人舊廬無它羨比荷 聖明采錄起官潮陽

銘心報稱循級而登方構數椽之居以妥吾母晨夕  
工未竣而母不待矣臨終猶啍啍誡詔願就先廬爲  
正寢吾與若父偕老歌斯哭斯兒慎毋違吾志嗟乎  
不肖罔極之報謂何此所爲淚血腐心不能自解也  
余謂太安人事舅姑相君子先後百艱叢集矢志恪  
勤以克有濟其賢於恒情殆十倍之憲副君行止進  
退一稟於義命駕五馬者再力摧彊禦撫綏蒸黔兢  
兢爲善養計乃蓼莪之思又菀結無已時君所爲報  
罔極可謂無負君可以輟哀矣狀又稱太安人性豁

遵方嚴巫兒佛媼不令見面即耄年康豫斗室寂寥  
不肯向山寺措一趾夫仲弟之嗣託孤女於太安人  
太安人厚加撫育竟日不離膝下相攸施衿諸事殫  
心力主之即疾亟猶注意焉其閑家篤親憂然士行  
如此於以昌金氏後未有涯也太安人葬以卒之年  
十一月初一日子時窀山坐甲向庚附祖墳之側余  
欽母德爲銘其墓曰詩稱女士天實釐之從以孫子  
令德貽之易稱嚴君母與父並風教之宣豈惟內政  
教于家因教于國有是母乃有是子我銘其藏以永  
垂麻于女史男女子孫嫁娶之詳具于左

嘉議大夫太僕寺卿王溪王公墓誌銘

黃生困沉痾謝筆研役而罔卿王溪王公之子昌胤  
將敦父葬事以銘墓請黃生曰吾黨有賢士大夫而  
盛美弗颺朋友之罪也矧吾年籍長兄也爰不辭而  
狀之公諱任重字尹卿先世居晉江之吳安鄉始于  
吉安教授公七傳而至公大父諱璉父諱寅皆以公  
貴贈大中大夫雲南布政司叅政大中公舉公晚其  
課公學也優游而已公嗜學精進年二十三補邑庠  
弟子員爲嘉靖乙卯越戊午督學胡先生試第一遂  
薦于鄉隆慶戊辰成進士授官司理廣州廣故號腴

郡又多訟獄公矢廉矢慎其約飭若素士聽讞若神明賢聲日振矣屬郡守與舶司構當道郵摘之株累及公遷貳柳州守久之事得白以廉能擢守其郡居三載調貴陽貴陽守入覲以郵傳故謫金華司理蓋柳州多豪家公持法嚴豪家中之當入覲時諸司如故事馳傳會新例束濕甚有所追糾者四人而公與焉坐寡交游乏奧援耳輿論爲之稱屈不一載遷貳守維揚遂擢守曲靖自公剖符以來通什邇興熊軾黃堂殆如傳舍又所蒞皆荒服地乃其拊輯黔庶著循良聲閱十載如一日也曲靖政成擢滇南臬副量



移陝西行太僕寺卿廼復晉叅滇藩公先後蒞滇者  
三當土酋俾言疆圉用兵之際棟事者仗公君左右  
手公廣設方畧豫儲蓄簡行伍明賞罰逆酋底定改  
土爲流所勛之力居多尋擢山東憲使董漕儲稽  
督多方號令嚴肅運艘魚貫抵潞河既報竣擢滇藩  
右伯聲猷益著寢寢開府矣以眼疾丐休致甚懇銓  
部惜之擬加太僕寺卿致仕因奉 俞旨云公抵里  
則屏囂守寂郡邑大夫自一通刺外無復私謁惟事  
關民瘼不靳爲之拯援里民輸粳福全倉苦跋涉抑  
索日久公爲請於當道得改折里閭懽呼相與建祠

立碑頌之郡太守竇公雅重公時時造廬請益有匿  
賦田當入官者請公酌賦受產公遜謝弗受其砥行  
遠利如此公居官居家手未嘗釋卷所著有家訓要  
家禮輯順大事宜邊務要畧滇漕二集王太守講章  
凡六種公天性慤淳少年時志聖賢之學室牖屋壁  
遍粘太極圖西銘時加究玩顧吾閩人篤信紫陽睹  
今世譚學者操戈入室不欲以口舌爭故遂置弗譚  
公守曲靖適江右李中丞公分憲金騰揭止修要義  
牖誨諸人士公聞而慕之曰此孔曾正傳於紫陽之  
教無所抵牾可信也遂互相衍繹爲諸士譚說即所

謂王太守講章者也吾里中後進夙慕公羣請公蒞  
席公又逡巡謝曰道貴實踐不在唇舌所愧實踐  
能敢以空譚爲諸君子標幟乎然公於實踐兩言  
真不愧者公敷歷所至升沉通塞備嘗之矣無喜  
亦無愠色其家居誠詔子若孫每遇一飲食衣服  
爲言耕耘織紵之苦勤惰奢儉之效聲聲不少置  
衣裋褐絺綌聲伎珍玩不一呈于耳目靜處一室  
止襟默坐盛夏無袒裼夜深無踦踞事不當意無遽  
色疾言即朋舊過從杯酒懽洽無談諧謔笑時令童  
子歌古詩讀古書而聽之每將就枕亦必誦孝經小

學二章曰修身齊家之事盡在是矣或謂公耄矣養生家宜早宴息公笑曰惟義理可以順性詩書可以陶情舍此而譚養生是異術也臨終之夕語不及家事了莫聞其駭咤鬱伊聲公之學所謂見其大者蓋昔史遷傳萬石君謂齊魯諸儒質行皆自爲以不及夫質行如公視齊魯諸儒奚遜焉猶逡巡退讓不欲以學自標令世人操評者無敢以文多質少爲儒者病繫公是賴焉矧公所教歷又章章足自表見矣公墓在邑五都高州山之麓負乙楫辛葬以卒之年十一月念九日銘曰世有偽儒羊質虎皮亦有迂儒黑

當玉卮夫其不言而躬行以蘊藉爲措施斯謂有用  
之實學微斯人誰與歸佳城閔矣惟令名其永垂

庠生丘君彥肅墓誌銘

君諱維棧彥肅其字君自游黌校時輒與余締文字  
社每社日君恒主之一時知名士多樂與交貧者或  
伏君館穀以濟其刻厲恬約一青布袍行道中飯脫  
粟盤無兼味蓋曰吾非故爲儉聞諸古人惟澹泊可  
以明志耳君雖藝舉子業而嗜古博習父中丞公多  
藏書君下帷繙閱證羣今故間爲文沈鬱雄勁咸軌  
古法而尤篤行好修卓以先民自期許常薄夫戔戔  
道學名者曰學顧躬行何如耳歲癸酉君年甫三十  
餘輒屏巾衿謝有司辟郡大夫丹陽丁公親勸爲之

駕弗爲動日課諸子姪讀書時稱引先德提誨之曰  
若輩儻隄繩檢外錯寸趾即以科第顯吾弗願也故  
丘氏子姓咸恂恂雅飭而君復躬率勵之終其身靡  
懈晚尤精研朱子家禮一書若冠若射博士家久廢  
弗講矣君獨撮其要義肄其儀節爲諸人士倡間一  
舉行之秩秩然卒度也余從宦二十餘年强半里居  
君時時過從擇語而發絕不譚人過廼至負悼俗之  
懷抱拯世之具則抵掌譚說疊疊不少休親朋宴集  
歌呼諧謔或引滿舉白無迂容顧端莊謦謦竟廢無  
一沉醉語己丑春余應召北上君親道吳郊酌一觴

爲余祝曰願足下勉策高勛功成身退與余爲逸樂  
會嗟乎詎謂一別而君遽長往哉君生嘉靖庚子卒  
萬曆己丑享年五十君之子宇熙貽余書宦邸請銘  
君墓而其甥莊太史狀之余稔知君太史狀特詳迺  
按狀序之曰君高祖童曾祖山祖瓊封監察御史贈  
大理寺右丞父中丞公養浩開府蜀楚母黃宜人南  
安右族也君生六歲而中丞公歿已哀毀如成人事  
母黃宜人孝思顧養咸稱篤摯既授室出爲仲父鴻  
臚公嗣執喪營葬一如喪葬中丞公追念嗣母洪推  
愛外氏割腴田四十頃供外大父丞嘗庶母李故有



恩又夙爲黃宜人所愛君終身母事之歲率諸子女奉觴爲壽其篤孝如此少稟業于伯兄禎事伯兄如父行坐不敢並臨事不敢專輒其事嫂如事母平居如馬少游不冠不敢見也從兄材爲叔父司訓公子君事之如事伯一門雖睦雅有姜氏風伯兄行海上倅遇寇挾以購贖君與從兄材皇駭號泣竟傾貲佐贖歸比二昆相繼天歿諸子女纍纍又大丰襁褓中君悉心拊育畢諸孤昏嫁身獨持三戶綴緝補苴二昆產藉不旁落姑姊妹暨諸族屬當其身無弗飫君惠者逮其後嗣無弗德君煦濡者值急難無弗藉君

匍匐赴者君常慷慨自許曰吾幸承先德席世資柰  
何自愛心力貽葛藟之誚矣君雖折節爲儉至其供  
祭祀庀祠墓務極豐腆中丞公崇隴穹碑而鴻臚公  
新阡與司訓中丞並只尺相望斥東隣爽塏地一區  
祠右丞公直不下數百金不以關諸從鴻臚公祠遷  
之自東奕然輦飛矢棘矣廼中丞公祠則特創宏規  
敞轟壯麗甚至貸子錢鬻旁產佐厥費或疑其泰侈  
又或以時詘諷君君曰吾子孫居室渠渠是誰所貽  
而忍儉其親以舉贏爲諱乎身營目構斯起晏罷者  
閱三餘載祠成而君告瘁矣疾革無它語惟爲其子

宇熙誦言行要留好樣與兒孫心術不可得罪於天地君生平大致如此邑中紳珮下逮賈豎畦孺無不知有丘季君者邦君大夫高其行誼亦嚮慕禮重之夫士豈尚藉科第顯哉君娶常州守張公志選女張歿遂不更娶納妾周氏相室事或竟歲不入室嘗言曰攝身猶置燭也室閉之則堅風暴之則淚世廼忍風燭置其身耶以故生平嗜欲甚節然並卒下壽命也夫子男二長即宇熙次宇焦墓在某山之原葬以某年某月某日銘曰士固有志豈必一命惟云孝友是亦爲政自古有死豈必喬錢歿垂令名是亦永年

仲子家範彥方鄉誼君實似之籍甚于世幽局長閑  
松隴生光雲仍綿綿視此銘章

江西吉安府通判殷盤翁君墓誌銘

君諱日躋字與新南京戶部員外郎諱堯英君父也  
戶部公有詩文名曩忘年與余友對榻譚詩間持君  
所爲舉子業示余余嘆美君千里才也是時君已蜚  
聲黌校中矣先後督學使南楚周公西蜀宋公皆特  
賞識君初入泮即充試額已遂受餼廩直謂且扶搖  
上耳而君自幼有志尚戶部公先令懷集君從在宦  
邸涓胥役憚令嚴不敢以私事請則陰入暮金嘗君  
君艷然叱之曰若儕謂吾易與耶立白諸戶部公痛  
繩之戶部公常亟稱君此兒不第讀父書其志趣才

謂將來殆未可量也所爲奇望君甚厚顧君之進取  
方銳而戶部公輒棄賓客矣時君大母太安人曾母  
安人林均在養也君居喪戚易兼摯提家當戶惟二  
母命是共及居大母喪暨母喪其戚易亦如之戶部  
公購田百餘畝祀翁氏始祖而下因旁及外氏以慰  
母心勸爲記未及舉行君承先志肇舉之調劑詳悉  
且以均二氏子孫之承祀者居恒閉戶讀書與仲氏  
日登內戰家政外友知名士治產厲學兩不相妨終  
仲身不忍折箸仲乏嗣遺孤女纍纍遠膝君撫摩鞠  
育視已女有加曰鵲鳩在原之念舍是其奚托

外族戚里閉市廛有以貧窶相依災難望拯者君差  
次親踈劑量緩急傾貲力濟之不自爲德也蓋自計  
部公歿君任家督者幾三十年孝友尚義著稱于族  
黨其拮据甚密支撐甚煩而學業不少輟顧困頓黷  
校之日久矣晚乃應序貢入太學又五年謁銓得吉  
安倅倅壓於守恒苦結約職事又繁猥揮霍之士不  
樂就焉君得之欣然曰吾起明經佐巨郡方自慙忝  
竊矧敢薄視一官乎既抵任而矢心廉慎兢兢焉愆  
隕越也舊時郡倅督饟者多耽閒養尊移叢神於邑  
佐君灼知其弊則堽竇室穴寬爲期會而躬程督之

嚮權舞文之吏不得詭借巧索以爲染指計即邑佐亦受成供事而已以故事易集而民不擾當道聞之咸嘖嘖稱曰此廉能吏導卻披窾材也盤根錯節可挈而試矣邑令缺必借君攝之初攝永新已復攝永寧皆劇邑胥吏輿隸素稔君嚴明盥手奉法君第詢閭閻利病爲之興除卹糶獨緩催科葺黽宮優禮耆衿子與講德問業循良之聲日起性又敏達善斷邑中有疑難事必詣君剴決禾川兩巨室爭郭外甌脫地民與士交關不肯相下當道以其事屬君君擧學博士與邑佐偕往按視士閥者學博糾之民閥者邑



佐糾之兩巨室凜凜各持券對簿參互左證而直枉立剖君徐出片言折焉事遂定盖其吏事明決如此君素耐煩瘁又以上下方倚重黽勉弗辭徃返郡邑間積勞構疾竟卒于郡邸囊篋朽然諸僚屬捐俸助之乃能具歛郡邑士民咸爲之隕涕云按狀翁氏家居郡城而籍永春宋江東提刑點自莆徙泉厥後有太師左丞相公尚簡數傳而至贈御史公勝又數傳爲太學生寬寬生輔輔生槐庭公環是爲君大父以計部公贈太僕寺丞君娶郭氏事舅姑孝謹家人宜之不數年卒有一女繼娶郡守陳公煌女無出而副

室吳舉男爲樞又繼娶郡守陳公選男太學生應宣  
女舉男爲機公享年五十有九子男二長爲樞萬曆  
庚戌進士次爲機公墓在晉江三十七都蔡山之原  
君曩所自營築也爲壙三今葬以萬曆庚戌十二月  
十三日中爲君藏左藏郭安人虞其右爲陳安人壽  
藏君之子爲樞謁余請銘惻然風木之思深痛君不  
待也有子如是即不待其奚戚銘曰學優矣而不必  
售仕優矣而不必究遺厥緒業佑啓爾後天之報施  
善人亦奚必百歲之爲壽

常德府知府我湖李公暨配 勅封孺人陳氏

合葬墓誌銘

我湖李公余文社友也又時時接杯酒懽丁卯歲同舟北上入長安同旅舍朝夕周旋者五閱月情乃益親嗣是渺莽萍踪離合靡定比余釋春曹里居也公歸自楚竊謂香山之社可以杖屨相追隨顧爲公居廬故過從稀簡公釋服未幾而遽逝矣今公子重芳等卜葬公謁余請銘余實病弗任也而誼不得辭公諱道先字克登初名少桶字克冬至計偕始易今名公生七歲喪母黃孺人繼母太孺人林拊育之父文

林公課公學銳甚月朔望集宗子弟爲文會每課皆  
公前矛文林公心竒之常自笑曰旁觀者謂我有譽  
兒癖乎公垂髫補邑弟子員先後學使者存菴金先  
生鳳阿姜先生試諸士皆首拔公尋以甲子舉鄉薦  
矣公性資磊落道遙無障獨臨事疑定其勵學亦日  
孜孜曩同舟時余與郭柳州洪左使督榜人甚亟嘗  
乘颶揚帆逆黃河而上自甲夜徹曙弗休公力阻之  
余儕不能從然竟以公言爲正旅居足不踰閩雖困  
勸必焚膏夜坐日鍵關對甕牖余排闥視之則案頭  
置三昧集焉蓋公之畏慎淬勵類如此既屢困公車

恒愀然嘆曰二親老矣不能早徼一命爲親榮謂予  
情何侍文林公疾晝問醫藥夜禱北斗寢饋俱廢逮  
憂居毀不自持二弟爲林太孺人所出者拊摩而教  
誨之曰庶藉此報二親乎庚辰謁選授廣西桂林司  
理直指使每按部於司理屬腹心耳目諸凡察官評  
讞獄訟皆藉手焉公每事精核其聽讞不爲深文人  
稱平恕壬午分校文武士得材獨盛直指使益委心  
公矣然公於郡邑事特所屬意不第持大體自引重  
已耳嘗署陽朔篆會均田事起公單騎遍歷壠畝手  
畫心計無匿賦亦無溢額懽呼載道又嘗署蒼梧守

蒼梧繇賦甲於粵西民稅四之商稅六之兵餉胥焉  
倚辦公察羸縮剔羨耗令人按籍自輸佐軍興無乏  
絕比還桂林惟圖書衣衾而已前後首膺薦剡者六  
擬當奉璽書徵會郡守欲庇其所私墨吏藉援於公  
而監司持之急守憾公遂螫公銓部徙爲衢州郡丞  
公怡然履任謂三衢爲趙清獻公故里則題其署曰  
琴鶴餘愧以見志云當道廉公賢其檄公攝令與守  
也殆無虛日公居官課農麻戢奸暴愛賢禮士黔赤  
衿弁咸宜之郡當水陸要衝郵籤旁午寇患山藪操  
舟行剽公力裁冗濫均勞逸又請於兩臺沿江列舟

師游徼郵卒行旅稱便其攝令江山也均田定賦一  
如在陽朔時民鏤碑頌德者二丞衢凡七載稍遷兩  
浙鹽運司同知行橐蕭然人謂公真不愧琴鶴矣浙  
鹽政視兩淮長蘆差簡而弊藪實繁公咨諏利便條  
陂議七十款白陂使者著爲令大都潔已惠商歲積  
羨三千金盡歸公帑涖商民永賴之而是時公敷歷  
久賢聲益溢矣尋遷爲常德守公自喜且自勗曰天  
斬吾一第乃得一第者猶或靳雙旌五馬吾其何以  
報稱耶龔黃趙張顧爲之何如耳至則却供應以風  
僚屬省詞訟以免株連飭保甲以驅奸宄武陵有障

河土堤積歲堙圯公集三老議改砌以石出帑鏹贖  
鍰爲將作費比石堤告竣而閭畝晏如也縉紳士民  
聚族而語吾郡千百年水利其在茲役守之功德鉅  
且遠矣會乙未計吏中公蜚語以原官調簡初公署  
陂篆時直指檄下按長吏不法狀公所爲湔雪多方  
而不能得之直指乃其人弗能諒也卒挾憤中公公  
恬然受之無所憾既奔母喪歸讀禮襄事已無復謁  
銓意念李氏宗祠未建行營湖山地飭材肇創煥然  
一新凡宗人告急必赴紛構必解諸頌義者無窮疾  
篤諸子受遺命不及家計其縣解如此公配陳孺人



侍御西郭公蕙之女于歸時文林公父母在養孺人  
共奉兩世有孝敬之德相太守公夙宵勤勞有鷄鳴  
之警茹糲衣布終其身弗改有葛覃之儉憐念庶子  
逾于已出有樛木鵲鳩之惠蓋真足稱公配矣李氏  
先世自唐江王避亂家閩至君達公而著數傳爲司  
巡公森旌義賜爵載在郡邑乘中森生焯廣東南雄  
府推官焯生將仕郎廷封廷封生錫錫生文林郎公  
澍娶孺人黃氏生公公滿司理考則贈父文林郎母  
黃贈孺人繼母林封太孺人而公配陳亦封孺人云  
公享年六十有三孺人享年七十有二墓在惠安縣

十九都洛陽護蓋山之原葬以萬曆庚戌

日黃生曰士君子持論必重素風羞濁富顧世有不  
諱貧者有偽稱貧者公宦游十有六載所至皆足自  
潤而重重守先世田廬塋畝靡增輪寔不飾公嘗謂  
楊關西以清白遺後聊用自况人亦信而慕之乃其  
閨闈之內不至如此門大夫所憂者所資於內助亦  
豈淺也泐士民追思公請于學使者祠公名宦銘曰  
造物幻化或挹或酌公於登顯之途非有餘於駁歷  
之途非不足所不足者林壑之逍遙而所有餘者宦  
游之芳燭璧焉雙輝車有輔轂勒此銘詞永光夜壑

中奉大夫江西右布政使仲葵許公暨配贈恭人李氏合葬墓誌銘

方伯仲葵許公以山東憲使入覲既辭闕下還抵任卒于官時已遷藩使于江右矣先是公叅藩西粵也緣入賀便道旋里屬有微恙遂移文兩臺乞休兩臺素重公勸駕諄切公強勉赴之而司銓者亦亟相柄用所推轂皆鉅藩崇撫在前遽爾長逝輿論惜之公諱國瓚字鼎卿先世爲光州固始人公祖諱鳳父贈中憲公諱執中傳尚書業著聲于郡庠生徒從游者甚盛公與伯兄太守公國誠並承家學後先舉進士

人稱二難公之舉進士也歲在萬曆丁丑初授南京  
禮部主事奉父諱歸服除改戶部出監兌于蘇松凡  
曹郎奏鹽書出者率持部使體自矜重事多抵牾公  
催兌精詳有法與屬邑令坦衷共事一切縉儀置弗  
較第曰願爲公家協力耳而自奉嗇約供億不繁官  
與民便之竣事還朝大司農特所器許諸曹事必諮  
詢委重公之名籍籍署中矣居五載晉僉東粵臬司  
分憲海北尋晉貴州少叅又奉母恭人諱歸會徐聞  
令以官評被糾科臣謂司憲者有所曲庇混糾及公  
與議以爲枉而銓司重違科臣言坐公當左調服除

赴銓得楚郴州守公恬然安之其爲政務在約已裕  
民而聽斷平恕兩造具服明允日孜孜職業弗爲遷  
容態也黔黎手額頌之閱歲餘遷南計部員外郎又  
三載遷守桂林嗣是遞擢副憲大叅皆在西粵盖兩  
粵先後制臺雅知公謂公宦粵中久於物情疆事皆  
所夙諳若試游刃於窾郤公亦不憚遐遠時時自慰  
曰人臣顧自効何如耳遠近奚擇哉公才具敏贍濟  
以鎮定而復以仁心爲質即擁節憑熊嚴重矣視百  
姓猶赤子也在海北治珠盜多所全活又殄定李茂  
等叛黨兵不血刃灼其脅從可赦者立釋之八服爲

神明桂林爲省會郡民彫瘠甚公加意綏輯當簿書  
旁午揮霍如流而煦濡不少輟諸邑令咸則而効焉  
西粵苦徭徭剽掠宦其地者習以勦殺徼功公分臬  
右江駐賓州故八寨盜藪也公與守若令約曰鳥獸  
猶可馴狎而况人乎第以恩威戢之可耳閱三載不  
煩一旅而群徭帖息賓桂之民亦曰吾儕飽食安居  
無干戈賦役之擾者藉公庇也蓋公官兩粵者四所  
至德惠旁溢人皆祠而祝之逮總憲山東未三月以  
入計行矣知公者咸嘆其用之未究焉初中憲公久  
困諸生家苦貧二親歿弗能葬比公營中憲公葬事

亦遂爲大父母庀馬鬣封時伯兄太守公未第也公獨力肩之無遲回顧望意宦游中外三十餘載自俸錢外不家于官憂居日間苦匱乏有告匱者猶倒困傾橐助之或溷以干謁事輒不答事伯兄恪謹待叔李二氏甚渥與共有無比宦達常祿足自給矣于諸內外姻戚殫心力調恤至爲解衣推食助葬舉婚若饋宿負然其施于家鄉者又如此兩庠士暨鄉三老請祀公鄉賢蓋直道民心于今不泯云公配贈恭人李氏爲鳳池鄉處士李大科女鳳池之李邑右族也處士奇愛公文行故以女許焉恭人于歸後輒力勤

女紅佐儒業比從夫貴膺翟帔猶不忘布素念身無  
艷衣口無擇味方伯公居官居家兩有令聞恭人實  
與贊襄焉恭人歿公不再娶蓋其注念遠矣公享年  
六十有三子男五日都日熙皆國學生日躋弟子負  
日新國學生日懋公墓在晉江縣三十二都古圳鄉  
即公先年所自擇處也公子日都等先期來謁銘而  
伯兄太守公爲之狀狀皆質實語不佞第稍稍詮次  
無所緣飾而系之銘曰汝南平輿之旦評潁川膠東  
之民譽得之難兼推之不去夫既兼而有之名與實  
附青烏升卜昔同德者今同藏其光華永賁于封樹



梧州府知府槐江丁公墓表

吾郡簪纓閥閱日有聲寓內乃制科之盛則始自嘉靖庚戌又多達官顯人也槐江丁公起家曹卽仕終二千石於宦籍不甚顯顧特煒然以名行著云公諱自申字某父封主事公某母安人張公自習舉子業時輒好攻古文詞握管數千言立就試常為諸士冠嘉靖己酉舉于鄉越明年成進士授南京工部營繕司主事進虞衡司卽中庚申出守順慶甲子調梧州留曹故閒寂南中又群籍數也公博購異書視事外卽扃戶繙閱迄丙夜乃罷以為常逮游宦蜀粵間載

之兼兩所為文飫醇噴英酷類歐曾二氏雖簿書殷  
奏弗輟頌讀顧其退食之軒曰優則人或謂公方經  
營四方柰何蠹隱蠅吟作雕蟲技獨不為吏事地耶  
公於吏事則顧甚習順慶俗訾窳甚儲穡屬採木後  
歲惡閭閻凋劫公下車咨詢利病次第罷行之緩征  
繇釋淹繫兩造聽其質成無問鉤矢鞭笞取薄懲而  
已有某子甲偽為篆將識其私券籍未果而乙盜用  
之事覺坐二人死公曰造者不用用者不造悉論從  
末減歲饑甲閉糴乙怒勉之顧實戚屬也理官當之  
劫盜律公曰是為親相盜矧犯由閉糴故甲終得晏

然耶遂傳輕比令歲稔倍償之粟兩人皆感悅去其  
決獄平恕類如是龍州夷酋爭界相讐殺積歲弗解  
事聞于朝監司檄公偕保寧守即訊之酋懼擁兵自  
衛保寧守請具甲冑從公曰無益祇啓負固心遂單  
車抵其壘酋感公意皆皇恐囚服謝罪丐自効事平  
升州治為龍安府大竹盜起公才邑簿李宗明密授  
公畧擒獲上其功兩臺超秩鎮撫之部中悉定已乃  
示嘉陵江卽紀村建漢將軍紀信祠葺泮宮市學田  
口廢為之以舉時時集青衿講德校藝焉郡邑嘗苦  
于公竭誠懇禱三日澍雨大應歲賴穰登南充邑署

伏誼周尊

址時為崇公為文祀之崇遂絕息人以

彭城隍

洛陽驅厲矣時公政聲籍甚乃為忌者

中得調

州梧州於粵西稱劇郡督臣時開府焉

需蠲免

無纖鉅皆就守關決公摺束主藏者毋

征毋凌削

嚴飭官市易諸駟僧不得緣為漁獵會

寇弗靖

合師征勦將領多掩平民為俘公詳讞科

諸事

陳牒自訴者驗實悉縱還所全活無算

公陰德也

居歲餘屢乞終養上官固留之弗

何聞

母訃歸公痛母歿弗及訣且封君春秋

上建口之為金慶元是七十之國坐前

中蜚語報罷公性伉直不能效俗吏婀娜態某僉憲  
子上舍生託省覲來順慶頗通所屬餽遺公故弗為  
禮曰君子以德愛人耳蒼梧監司某好嚴飭邊幅令  
郡守懷牘入謁毋得從吏人公咲曰有令甲在吾熊  
軾朱旛安能手牘局趣如掾吏鹽亭令受賕事發有  
力者為居間直指以其事屬公令投百金為公壽公  
曰令不受賕此物奚宜至哉竟按致之法凡公所為  
強直自遂皆足失上官意然卒無悔也初公在虞衡  
董園法事中貴人筦其柄者乘時欲有所乾沒公一  
切以法裁之無或假貸識者預以此覘公矣既失官

家居棧戶逃寂自視膳問寢之暇日惟飭族屬建宗祠于有司絕無所造請為樓數楹庋書數萬弓名其堂曰希鄴卒之前數日猶據案展閱不為疲云黃生曰班氏傳文苑循吏各以其專長著惟黃文彊博習經典而拊循魏郡足與衛颯任延並稱王仲通垂績廬江而廣闢群書論著賦頌文多可採蓋庶幾兼長矣余睹公生平實似之乃居官居家尤章章砥礪也余蓋心欽鄉慕焉因表其大者勒諸麗牲之石

張母錢太孺人墓表

京兆張君自粵西馳一介寓書于黃生曰傷哉文熙之不孝也母歿而弗獲奉永訣也陟屺之慟終天靡極惟先生表吾母墓垂不朽庶藉以追皐者先是京兆君居京師一日忽心躍身顫君竊念曰其為吾母起居弗寧乎君母太孺人錢時從其仲子貳守延熙居紹興郡邸也君方廩門謀謁告無何而家僮自浙中至云太孺人疾革君遂疏乞假得省侍歸歸而道紹興省覲則太孺人疾瘳矣顧獨傷念其叔子嘉熙有歸志貳守君亦遂棄其官與京兆君奉母還粵既

抵里而斑斕交映孫枝滿前歲時稱觴甚適神甚王也居二年為萬曆己丑京兆君逼簡書期矣太孺人督之曰而兄以艾齡投簪守子舍而復遭延不出誰當報國恩者京兆君黽勉束裝行至毘陵而太孺人卒君所為追慕感泣如不欲生者也太孺人家世廣西桂林人處士錢經之女己丑進士璧之妹鄧州學正贈侍御景華公繼室伯子東熙官隨州守景華公元配左出也太孺人子四為貳守延熙次貞熙蚤卒次嘉熙官龍泉令次文熙丁丑進士讀中祕書授監察御史擢順天府丞門閥燁為郡中冠侍御公諱騰



膏冠嘉靖壬午鄉薦司教于鄧太孺人從之官時姑  
徐方就養而前孺人尹母侯太孺人母左並在也太  
孺人身茹麤糲耳澹泊而日理腴毳以供徐姑洎侯  
左二老人務得其懽洽人謂太孺人之為婦也有班  
姬之順焉侍御公性伉直與鄧州守迂則發憤嘆曰  
大丈夫安能日羈樊籠向鷄鶩爭一飽耶吾從此逝  
矣太孺人贊之遂投効去而都授邑中諸弟子以經  
學顯者甚衆公弟及伯子亦先後薦鄉書矣公乃與  
里中名公結吟社飛觴分韻月六七會以為常太孺  
人勤女紅織紵佐醴饌而復以其餘贏充諸女治裝

費侍御公得恬然嬉敖泉石者餘二十年人謂太孺人之相侍御公也有萊婦鴻妻之風焉尹孺人卒時隨州君甫六齡耳又病弱太孺人至則昕夕為之噢咻親其燥濕真不啻已子也比稍長輒督之學不為姑息愛隨州君爰克踵前軌以不墮家聲人謂太孺人之為繼母也有翟子威繼母之德焉當侍御公歿貳守君已有聲于庠其餘貌諸孤學未就也太孺人儼然為諸子師日課使就傳稍嬉嬖輒撻楚弗貸以故三子均由科第奮貳守君歷著官閥龍泉令不幸中道夫亦寢寢循良譽矣京兆君以直指使按兩浙

值兵民之變力為戡定太孺人方從貳君令餘干微聞其事則謂貳守君曰吾季兒足辨此第寄聲勉為之勿以老人為意其識達大體如此太孺人壺訓嚴教飭諸子率以礪名行慎官箴為誡諸子恪訓逡逡即貞熙婦早稱未亡人亦蓬首冰心凜然勵栢舟節人謂太孺人之肅閨閫也有中國夫人之範焉黃生曰夫表者標也標其幽懿而揭之也古史冊所載令妻賢母身處閨閫而垂徽彤管聲施至今即具一德焉已足標而著矣乃太孺人具美若是不宜永為女史耀耶余謹為掇其懿行貽京兆君以勒諸墓石

誥贈奉政大夫河南按察司僉事龍岡朱公墓  
表

贈臬憲大夫龍岡朱公之葬也蓋十六年往矣是歲  
丁亥厥子藩叅君貽書黃生曰先大夫葬時不肖東  
光未能爲親徼一命墓中之石闕焉未銘今幸徼

寵靈賁阡隴矣猶思無以揚盛歟詔後觀也竊謂銘  
諸幽不如揭諸隧惟足下圖之黃生與藩叅君同省  
薦又同舉進士每驅馳南北憇足紫陽之鄉剽聞公  
質行頗具而藩叅君所爲傳及壙誌皆質言無緣飾  
語乃按而序之曰公諱埴別號龍岡曾祖澄行二祖

相行一父攸行煬六世有隱德爲江右撫州臨川之  
百五都人煬六公客游建州以積著自饒給顧瞻于  
龍山天湖之墟徘徊不能去曰此大儒所居地也慨  
然有卜宅意逮公始寓籍浦城就郡治居焉公質魯  
而口呐煬六公遣諸塾師學授經史僅解其指歸不  
甚成誦煬六公咲曰是足給札記傳邴氏業耳顧諸  
子中端平侃直無如公遂屬公貲產而束裝歸奉溫  
清時公年甫十五且伯兄均在公奉命入市廛蓋葷  
酒不濡唇者逾半稔族公旋之日告成事乃飲酒食  
肉如故也煬六公旣倦家政則析產爲三俾諸子修

業而息焉公讓腴受瘠讓豐受尠已乃汎胥濤於錢塘探禹穴於會稽放乎太湖夷猶於羊城櫂武夷返曰天下壯游在是矣性素矻矻負氣有徂僧負商人金者責償諸賈客而波及公公弗爲動也則訟諸官竟枉坐代償而徂僧立空券付公公不勝憤曰夫擇術貴慎耳假令我冠博帶方領矩趨詎庸可枉乎自是謝家人產不問而一意課其子學時時指韋齋文公諸祠語之曰先哲在望子必勉之藩叅君奉公教凜凜猶時不免譴訶也比舉進士筮官平陽令取道迎養弗許之宦邸再三迎乃趑趑往竟不踰月歸屬

旅况蕭條行橐不備公登途八躍然喜矣里居與物  
無競而涇渭甚晰匪其類不交每歲首輒進族屬觴  
之諭以孝友禮讓靳毋玷德門宗黨翕然化焉郡邑  
大夫雅重公屢延公爲鄉飲賓重一再應其耽寂避  
喧類若此公生弘治乙丑十二月庚午卒隆慶辛未  
重九後二日享壽六十有七公雖蚤廢儒業晚年嗜  
頌讀求解悟尤喜軒岐鍼砭術若靈樞素問諸書所  
夕不停閱能診脉決腸胃膏肓之疾若隔垣睹者居  
恒語人曰吾豈欲博秦越人之名聊以資調攝足矣  
顧未逮七十而卒命也夫丈夫子四長銓次鏌次即

藩叅君東光次東魯舉福建己卯省試方藩叅君以  
循良內召擢爲給事中也上封事忤 旨留中不下  
旁觀者或爲君危之君曰此先人遺教不肖何敢自  
愛尋出僉臬憲駁歷有聲即制詞稱公云蹈仁秉誼  
式表鄉閭迪德貽謀玉成賢胤 聖天 萬里  
已第令黃生疊疊千百言其何能加此華表也用揭  
于墓隧之石以闡潛德揚休命朱氏子孫其永世無  
斁矣



贈承德郎南京戶部主事南石田公暨配安人  
陳氏墓表

大田之田氏始爲延平尤溪人正德間增設邑治割  
尤溪數里隸焉因遂籍大田田氏世居梅山學憲公  
頊始以科第顯今計部君瑄翰讀君一雋後先成進  
士門閥甲于邑中邑長老私相詫曰大田者田氏始  
大也自建邑命名時若爲之預兆云黃生守南詞林  
計部君亦官留都一日謁黃生請曰瑄不肖謬博一  
第而祿弗逮吾父吾母幸且逮養矣又復棄去也先  
父母葬有年惟是墓上之碣未有所託敢徼惠足下

爲阡隴光計部君溫恭雅飭篤行君子也蓋世德所  
由來遠矣按狀贈君諱張字世重別號南石公生稟  
至性天資樸茂有葛天無懷氏風父處士公歿時公  
年尚幼輒號毀踰節竟老猶嬰孺慕也二三兄弟不  
相能公泫然流涕曰尤而効之即異日何以面先人  
地下溫遜篤愛不以其故少衰父母喪事一以身肩  
之無幾微顧望意課計部君學偶誦詩至常棣之三  
章則擊節沉吟若與意會然者伯兄嘗卧病床褥屬  
寇至衆相率逃竄公獨率婦子環守之曰兄弟急難  
正謂是矣吾義豈得獨全其至性如此仲兄嫡邀然

賢省恒苦匱乏公每爲稱貸供之至捐已貲以償弗  
計也山棲自耕讀外一無所問值鄉佐如詣官府招  
之輒認認竦顏里有大役弟輸金畀行者或豪橫漁  
獵公亦逡巡應爲未嘗一色逕問里中久滋重之居  
常語計部君曰夫士先行詎詎寧咕嗶云乎哉人謂  
公蓋以身範焉公配安人陳氏漳平右族也能讀內  
則孝經諸書歸贈君以弗逮事舅姑爲憾輒斥替珥  
充營葬費嚴事諸伯如舅撫夫弟及妹曲備恩禮惟  
恐拂贈君心也晚年家漸落益刻勵勤績泉以接衣  
食恒不能溫飽至待賓客奉禱祀則務致豐腆性慈

祥樂振人之急即損日饒予之不色恡督諸子耕讀  
夙宵忘勸錢穀出入皆手自籍記不以煩贈君計部  
君舉進士次當爲令安人聞而喜曰邑令最親民吾  
儕比落安全寔恃若父母藉令急催科繁刑法即闔  
境靡寧吾且就吾兒官邸側耳聽之庶不以敲朴聲  
聒吾耳此其爲父母也大矣計部君銓令吳縣疾馳  
入里下圖御安人就養而安人嬰劇疾矣閱二旬餘  
竟不起計部君至今念之垂泣曰瑄叨宰百里黽勉  
厥職以無得罪黔黎恃吾母遺訓也黃生曰夫窮閭  
藜藿之士砥行鄉閭有聞章徹者豈鮮哉顧以李大

遜之孝友而不行於其妻大原王氏之夫婦偕隱同聲而負慙於其子蓋婉德詒穀若斯之難也廼贈君與安人皆嫜節好修聲施里黨克俾計部君奉其矩矱以亢由氏宗此之爲德庸可使晡塲弗傳耶因論次其事歸計部君揭之于墓左

勅封承德郎南京工部都水司主事楓林黃公墓表

封南京工部都水司主事楓林黃公故徽州休寧人  
旅寓錢塘因家焉今南京禮部祠祭司主事金色公  
仲子也祠部君兩令劇邑有政聲其令吾晉江時實  
聞公計以去敝衣殘篋幾無以爲歸也嗣由德興令  
擢南水部以監督泉布事持法迂權貴人被誣劾罷  
事既白迺起令官公家法驗已祠部君謁余請表公  
墓余與君同進士舉君又有大造于吾邑勒在口碑  
語亦有之飲河溯源乃按狀而序之曰公諱賜璋字

廷錫公生四歲而父天序公歿母程孺人旦夕携公  
籲天而祝曰天道有知其存黃氏孤以延厥胤乎群  
從兄利其產則縱橫齟齬之公奉母命竄居錢塘修  
計倪之業娶封太安人符氏相與勤嗇拮据因致饒  
益乃間關歸葬父于水母伯塘而御程孺人東就朝  
夕養居十一年而程孺人卒復扶櫬歸合窆焉公性  
質厚慷慨樂振人之急歲值大侵穀價騰踊公悉倒  
函廩貸諸隣里度弗能償者還其券嘗貿布付諸染  
人染人質爲食公憐其乏贖畀焉旋贖旋質亦竟置  
弗問也外父符誠翁媪耄年不自給饔飧殯葬皆藉

公貲穡且給其子孫不絕浮梁汪伯川者司訓龍泉  
坐事爲督學使者所攝冒雪失侶凍饑弗能自存公  
一見輒出衣被漿醪款之遂爲石交復捐貲力爲營  
免終不責其償蓋輕財重義類如此從兄雲璋即曩  
齟齬公者也卧病于杭旅舍公延醫躬視湯藥死復  
經紀其喪有龍璋者稍知書嘗求公叔子中色爲後  
公命中色嗣之顧貲產已爲強者魚肉矣則怡然曰  
吾重違歿者意安問其它族黨中以此益頌公厚德  
云公有丈夫子四皆課令業儒行經師修每罄囊橐  
不少吝欸致諸僑士與其子游接引甚備至有待以



舉火者聞東廓鄒先生暨浙中名公講學于天真寺  
輒扶杖往聽仍遣諸子從學焉嘗呼謂其子曰古稱  
畏四知其實惟畏已知足矣居間整襟危坐養氣嗽  
津未嘗睹一疾言遽色于聖賢典訓與佛道家言誦  
法惟謹月率齋十日尤戒殺生日買放禽魚之屬倣  
曹溪法意即在貧窘時嘗嚮米以其餘啖鳥雀能呼  
集坐隅令戢翼馴擾行年七十餘矣而顏猶童卒之  
日形神弗變公於真如谷神之旨良已涉其深哉公  
生弘治戊午閏十一月十五日卒隆慶己巳十二月  
二十四日子男四長尚色次即祠部君金色次中色

次正色俱庠生祠部君初葬公于錢塘龍華山不吉  
改葬于定北鄉范村之同豫山酉山卯向祠部君輯  
宗譜考畧持眎余余受而讀之黃氏自新安守而下  
太府丞而上閑閱簪纓一何綿邈也子孫義弗仕元  
隱于耕植積著間以自娛適迄明興遞相沿襲未  
有以詩書奮者詩書之澤乃昌自公當其子影惇踪  
飄泊它境蓋艱危甚矣卒克成母志授子一經以昌  
黃氏胤屹然偉丈夫哉非甚累行曷克臻此者乎夫  
南陽之阡名者弗改白社之隧亭曰思賢揚之而逾  
抑晦之而彌章厥繫在德余既次公行事而表之曰

此楓林黃公之墓異時過公墓下者當有永思奚啻  
黃氏孫子矣

贈大中大夫山西布政司叅政孚齋陳公墓表  
贈叅知孚齋陳公之葬也京山李太史本寧銘其墓  
矣公之子方伯使君謂曩毀瘁中詮述先德猶多掛  
漏爰致盛美未章復采撫見聞縷縷叙述委黃生表  
焉愧蕪陋奚敢與名筆偶以大孝至念弗敢辭乃按  
行畧次之曰公諱璽字庭玉先世居樂安之羅陂里  
代多聞人公高祖世貞挾貲游三楚抵景陵之松石  
覽勝裴徊因卜居焉娶李碩人生律寬律寬娶謝碩  
人生清溪公守廉世積隱德清溪公娶黃淑人生公  
比方伯使君貴贈清溪公及公皆中大夫山西叅政

而公母黃與配戴皆贈淑人公生有貴徵稍長風氣  
 適上屹屹負大志時伯兄茂才策仲兄司諭表學業  
 方轟起清溪公銳意督之未遑及公也公抑首下帷  
 既該洽復有精詣司諭公時發論難輒響應無窮且  
 若連柱五鹿君者司諭公大咤異曰昔人謂阿連才  
 悟而尊作常兒遇之者殆今日類乎言諸清溪公廼  
 督公與二兄埒公自是治經生業益工試於邑試於  
 督學暨臺使者皆軒然首列而季弟大治司訓範亦  
 連翩上矣每督學使至公三弟弟並躋高等仲季餽  
 于庠公既厄棘闈即需次原亦弟值公處之澹如

也諸人士企慕公執經傳業者踵接時資其束脯以  
供滫瀡佐誦讀貧弗克自行者置勿問公二子時已  
疑然穎拔公自慰曰老驥伏櫪汗血駒足任鞭策矣  
遂一意課二子棄舉子業不復事事而獨里閭有義  
舉恒黽勉爲群力倡所居松石三面据岡巒東窪下  
常苦蕩析公倡於衆築隄捍衛值水溢則衝風沐雨  
躬畚鍤先之隄藉以完復請於當道專官爲植而隄  
壩崇隆比於岡阜嗣以旱潦不時議爲蓄洩計壩外  
陳氏誅讒說有所抵牾出忿語侵公而方伯使君適  
登省試公喜曰寧人侮我無我侮人遂躬造陳氏與

爲和好如初人咸頌公功又服公雅量曰幸願哉公  
有子也方伯使君將計偕公捐坊金之半分贍親族  
而別營道里費與偕北比薦南宮公語之曰攻駒範  
馳良自不易吾以爾歸矣歸三載乃赴對制策已而  
奔戴太淑人喪先後里居者幾以七載計自報謁邦  
大夫外不許輒乘肩輿曰少年貴人坐車中令長老  
引匿非萬石君家所禁耶里巷人謂公家橋梓依然  
兩寒士也使君赴官起曹奉簡書典雲南試已而司  
榷武林公不色喜或貽書或面命以矢慎矢清爲戒  
凜凜如也使君嘗市海錯吳縑上壽則拒弗內曰疏

食糲褐足吾分矣安用此尋以樵還滿考封公工部  
郎日圖解組歸定省而公不待矣始公爲諸生時二  
弟方需學業已而仲氏復從宦庭闈溫清公朝夕周  
旋獨多而二尊人獨最懼公養也清溪公嘗病疫殆  
甚公不解衣而侍蚤夜搏顙顙天假寐間夢兩青衣  
使者踵門瞪目視亟携牒去曰往隔岸某家耳寤以  
告諸弟弟相與望空跽謝清溪公果霍然病已詰旦  
聞隔岸某物故蓋與同姓字者仲氏初訓松滋以荆  
爲材木藪謀爲黃淑人豫殮具而公任行過長湖巨  
浪拍天舟幾覆公焚香虔禱蟻命不足恤柰貽九十



老母憂何旋返風無恙同舟人擬諸跛男子之庇而不知公固孝感也此二事里黨嘖嘖並傳之第第五人友愛獨至疑相質文行相切劇晚年則醴茗晤對色笑相綢洽迄垂白乃始折箸每有大工大役輒當先綜理無它諉少季麓待以爲家若取諸寄已又撫其孤而字之於貧宗維護特厚人人稱公家爲義門性素戇然坦易不設城府即田畝里生咸與鈞禮所訓勅族黨子姓惟令折節懲忿毋爲禍先邑豪樸田於公季弟忽鮮衣怒馬群而至榜笞田奴公目季弟謹避之歸其困勿與校乃其人竟以兇敗族年備工

豪家被捶斃或謂奇貨可居者仲氏之傳婢亡命有  
旁入陰爲踪跡至株綴十餘徒者公曰乘仇獵賄非  
義蒙疑設弇非仁率皆置之意外漢川民某被剽掠  
有所誣執爲盜者十三人公灼其寃力與諸弟弟議  
又約於鄉不可當吾里而寃覆盆卒竭貲營救以免  
孟仁聲義問逾盜溢于里中矣公既拜綸命列在縉  
紳絕不肯束帶入公府尤絕耻聞請寄事客以事來  
謁者飲之醇酒至沉醉不憶所欲言即操重賄啗公  
第應曰非望之福吾何德以承之度田事興產厚而  
私營者衆公以才諳方嚴爲輿議所推舉履畝則壤

無私低昂闔邑頌之善哉陳孺子之爲宰也里黨有  
虞芮爭必詣公亭質片言而解間有爲不善者猶悚  
然曰陳君所短得無畏乎每歲儉度庾有餘糧即平  
直貿鬻或以贖金售家僮請追之公曰是或逼貧窶  
以稱貸來追及之且有無聊之思姑已矣賦長若曹  
若李窘積逋力不能支挈妻子而竄公多方招捄迄  
用復業兩家尸而祝之不替居恒從一奚童徒步縱  
行邑里與諸父老子弟譚陰晴占歲時豐歉所誦記  
公車諫草諸籍及所習國家典故抵掌疊疊聽者傾  
動或言其財至如流水恐且溢而涸又或言其宦囊

太盈侈恐且歎而傾卒皆如其言公之教于家大率  
類此方伯使君所至以砥礪著聲式穀似也蓋劉勰  
有言後漢以來碑碣雲起才鋒所斲莫高蔡邕彼其  
時如姜徵君陳太丘郭有道士大夫景慕之相與刊  
石立碑標厥德懿以垂永永其文詞則皆蔡中郎筆  
今碑文具在不知言重人耶抑人重言也贈公孝友  
篤摯似姜徵君醇德化俗似陳太丘郭有道是宜標  
美貞砥為世儀表顧余言燕陋視蔡中郎愧甚讀斯  
碑者尚論其世亦慊然可以興云公壽六十有八葬  
皇華堰子男三長所前起歲薦今任其官次即方伯

使君所學癸未進士次某庠生